

3^{ZA} SESSIONE STRASURDINARIA DI U 2025
26 È 27 DI GHJUGNU DI U 2025

3^{ÈME} SESSION EXTRAORDINAIRE DE 2025
26 ET 27 JUIN 2025

N° 2025/E3/037

**Question orale déposée par Mme Véronique PIETRI
au nom du groupe « Core in Fronte »**

**OBJET : DI PETTU À I CULUNIALISTI, ÒN HÈ TEMPU CHÌ A CULLETTIVITÀ
SI MOVE PÀ A LINGUA CORSA ?**

« Comment accepter que ces enfants soient contraints de poursuivre une scolarité bilingue, réduisant davantage leurs chances de réussite ? »

Eccu un pezzu di ciò ch'eddu scrivi Claude Perrin, prisenenti di a FCPE di Corsica, in una lettara mandata à a Ministra di l'Educazioni francesa, l'11 di ghjugnu.

Un iscrittu chì metti in causa, di manera chjara, u bislinguisimu, a so leghjittimità, a so generalizazioni è u pianu 2030 di u Ritturatu chì faci di a lingua corsa un sapè fundamintali.

Un iscrittu chì hè una vera dichjarazioni di guerra. In u quadru di un antru sughjettu, aviatu adupratu sti paroddi. Oghji, stu fattu vi devi fà riaghjiscia incù a listessa zerga è cambià d'andatura.

In una mandatura cuerenti, impignata in azzioni forti pà a nostra lingua, una tali lettara ùn saria stata pussibuli. Ma oghji, stu tippu di dichjarazioni trova un tarrenu favurevuli : un tarrenu di tralascera, di silenziu, è una situazione di fragilità pulitica.

Aveti vulsutu piglià a carica di a delegazioni lingua corsa. Ma dipoi, nunda !

In parechji uccasioni u nostru gruppu hè intarvinutu pà dumandà conti, pà prupona, pà rilancià. Ogni volta, c'aveti rispostu cù generalità, prumessi, o mezi misuri. È u risultatu si vedi.

À forza di lascià u spaziu viotu, si facini strada i discorsi di paura è di rigressu.

Ùn c'impunimi più, ùn ci femi più valè ! Ùn difendimi più cun forza i nostri dritti, è stu silenziu hè pigliatu pà dibbulezza. È cum'eddu dici stu dettu corsu : « *À chì si faci agneddu, a volpi u si magna.* »

Intantu, d'altri voci si facini senta. Avemi intesu dui cullettivi : « Femula Campà » è « Parlemu Corsu » chì ani sprimatu a listessa inchiitudini. C'ani trasmessu pruposti cuncreti è rialisti, una basa seria pà avvià un veru travagliu, cù a suciità è micca senza edda. Spartini u nostru puntu di vista : a lingua hà bisognu di risposti pulitichi forti.

Emi intesu parlà d'una istanza nova, d'una cummissioni chì saria finalmente missa in ballu. Ma sin'a oghji : nunda d'ufficiali, nunda d'attivatu.

Allora, Sgiò Prisidenti :

- Davanti à a rigrissioni di a lingua, in a tupunimia, in l'abbandonu di a cartula, ... in l'assalti sempri più forti contr'à i nostri dritti linguistichi, chì penseti di fà ?
- Quandu mittareti in piazza una struttura didicata, aparta, chì darà a parodda à quiddi chì travagliani ?
- Quandu daretu à a Corsica un veru signali di vulintà pulitica pà a so lingua ?

Parchì quì, ùn si tratta più d'un dibattitu, si tratta d'urgenza !

Vi ringraziemi.